



Progetu finantziau cun su dinai de sa Regione Autònoma de Sardigna cunformas a sa L. 482/99 e a sa L.R. 22/2018

Cèsare Barcellona Rei de Barace

Me is tempus antiquus biviati unu grandu Rei de nòmini Cèsare ma totus ddu tzerriant Barcellona. Issu fiat Rei de Barace, una tzitadi manna e arrica meda ca s'agatàt acanta de s'Alighera e Biddanoa.

In cussus tempus nci fiat stètia una gherra a Biddanoa intra su Rei Ixàscia e su Conti de Biddanoa. Custu iat preguntau a Cèsare de ddu amparai e Cèsare ddoi est andau cun sa spera de otenni cumenti arregallu, po su servitziu, su cuaddu birdi de Monteleone, ca dd'iat biu e ddi fiat praxu. Custu cuaddu fiat tzerriau su Steddu Diana.

Cèsare iat bintu sa gherra ma su Conti non dd'iat donau su cuaddu e Cèsare fiat torrau a Barace arrannegau e iat promitieu de non fai beni prus a nemus. Iat fatu sciorrocai totus is crèsias, iat fatu bociri is predis, no iat fatu batiai prus is pipius, no iat fatu cojai prus sa genti e no iat fatu prus sa limùsina a is pòberus. E custa vida mala est durada po seti annus.

Ma una una diri Gesùs Cristu bistiu de pòberu s'est presentau e dd'at nau de torrai su pòpulu a sa lei Cristiana. Cèsare dd'at ascurtau po unu pagu, e apustis dd'at nau ca chi non si nd'andàt bociat fintzas a issu.

Su pòberu arraspundiat sèmpiri e Cèsare arrannegau nd'at bogau a foras sa spada e nc'at ghetau unu tzèrriu e su pòberu est sparèssiu. Intzandus Gesùs Cristu est andau in giru in sa tzitadi a pediri sa limùsina, ma totu sa genti nci-ddu bogàt e ddu stratallàt, ddu scudiat a perda e nci-dd'ant fintzas bogau de sa bidida.

Acanta de cussa bidida nci fiat una fèmina ca po bivi fadiat su pani, Gesùs Cristu est andau innoi puru po pediri sa limùsina, intzandus sa fèmina at inforrau unu arrogu de pasta in su forru a linna po si-ddu donai, ma cussu uncueddu est diventau mannu cantu su forru, intzandus nd'at postu unu àteru e cussu puru est crèsciu cantu su forru.

Apustis sa fèmina nd'at segau unu arrogheddu e dd'at donau a cussu pòberu ma dd'at nau de si-ndi andai de inni. Intzandus Gesùs Cristu dd'at nada ca si si boliat sarvai depiat pigai su pani e sa pipia de tres mesis ca teniat e si-ndi depiat andai in su sartu. Ma chi essit intèndiu calisiat stragatzu o sonu non si depiat furriai a palas ca sa bidde iat a essi stètia derruta.

Intzandus at cumentzau a scurigai su soli, a fai frius, a proi àcua, arranas e pìberas e apustis s'acua de su mari at allagau totu sa tzitadi e nd'at fatu unu pauli.

A su carraxu de sa genti sa fèmina s'est furriada e est stètia mudada in pedra e inni s'agatat ancora oi. Is boxis e su sonu si funt intèndius po unu mesi e dònna annu in cussa diri acanta de su pauli s'intendint is matessis sonus.